

13. gr.

Fulltrúaráðið getur samþykkt að gefa nýjum félögum kost á að gerast aðilar að sjálfseignarstofnuninni og tilnefna fulltrúa í fulltrúaráð hennar ef $\frac{4}{5}$ fulltrúaráðsmanna samþykkja það. Hætti einhver stofnenda störfum (félag lagt niður) fækkar fulltrúaráðsmönnum að sama skapi þegar kjörtímabili lýkur. Verði aðilar þeir sem aðild eiga að sjálfseignarstofnuninni þrír eða færri, eða félögum fækkar svo vegna ákvörðunnar þeirra um að hætta afskiptum af sjálfseignarstofnuninni, fellur fulltrúaráðið niður, en stjórnin endurnýjar sig sjálf, þannig að tveir stjórnarmenn velja þriðja mann í stjórn með sér. Verði aðeins einn aðalmaður eftir í stjórn taka varamenn þátt í vali nýrra aðalmanna í stjórn.

14. gr.

Skipulagsskrá þessari getur fulltrúaráðið ekki breytt nema með $\frac{4}{5}$ atkvæða allra fulltrúaráðsmanna, en þó því aðeins að Stjórnarráð Íslands (það ráðuneyti sem fer með staðfestingar skipulagsskráa) staðfesti þær.

Ef fulltrúaráð hefur lagst niður samkvæmt 13. gr. kemur stjórn skólans í stað þess varðandi þau málefni sem 1. mgr. þessarar greinar fjallar um með þeirri breytingu að $\frac{2}{3}$ stjórnar komi í stað $\frac{4}{5}$ fulltrúaráðs.

15. gr.

Leita skal staðfestingar forseta Íslands á skipulagsskrá þessari.

16. gr.

Skipulagsskráin þannig samþykkt á stofnfundi skólans þann 7. maí 1985.

LÖGREGLUSAMÞYKKT

fyrir Vestur-Ísafjarðarsýslu.

I. KAFLI

Um reglur og velsæmi á almannafæri.

Uppbót eða óspektir mega ekki eiga sér stað á almannafæri. Ekki mega menn þyrpast saman, svo að til tálma sé fyrir umferð eða óþæginda fyrir vegfarendur. Með almannafæri er átt við vegi, götur og svæði, t. d. hafnasvæði, sem almenningur fer um og ætluð er honum til nota. Um samkomuhús og opinberar stofnanir gilda ákvæði þessarar samþykktar, eftir því sem við á.

2. gr.

Þegar fjölmenni safnast saman á almannafæri í því skyni að sinna lögmætum erindum, skal raða sér þannig, að þeir, sem fyrstir koma, fái fyrstir afgreiðslu. Viðstöddum ber að haga sér í einu og öllu eftir þeim fyrirmælum, sem lögregla eða umsjónarmaður gefur til að halda uppi góðri reglu.

3. gr.

Þeir, sem hyggjast efna til útifundar eða fara í hóp göngu, skulu tilkynna það lögreglustjóra með hæfilegum fyrirvara. Tilkynningu um hóp göngu skal fylgja nákvæm lýsing á fyrirhugaðri gönguleið. Lögreglustjóra er heimilt að breyta leiðinni, á hvaða stigi sem er, ef hann telur brýna nauðsyn til.

4. gr.

Á almannafæri má ekki fljúgast á né hafa í frammi hávaða eða annars konar háttarlag, sem veldur ónæði eða raskar allsherjarreglu. Óheimilt er að þeyta hátalara eða hafa hljómflutningstæki svo hátt stillt, að það valdi ónæði eða truflun. Í kirkjugörðum og grafreitum ber að virða grafarhelgi í hvívetna og fara þar hljóðlega um.

5. gr.

Enginn má klæðast né hegða sér þannig á almannafæri, að misboðið sé almennu velsæmi.

6. gr.

Bannað er að raska næturró manna að óþörfu. Enginn má án tilefnis berja á dyr eða glugga, hringja dyrabjöllum eða hafast neitt það að, sem valdið getur ónæði eða ótta.

7. gr.

Á götum kauptúna sýslunnar eða þar, sem hætta getur stafað af, má ekki renna sér á sleðum, skautum né vera að leikjum, þannig að truflað geti umferð eða valdið hættu. Bannað er að hanga aftan í bifreiðum eða öðrum farartækjum, sem eru á ferð. Bannað er að kasta grjóti, snjókulum eða öðru, ef það veldur óþægindum eða tjóni.

8. gr.

Allir eru skyldir til að segja til nafns síns og heimilis, ef lögregla krefst þess.

9. gr.

Bannað er að skjóta af byssum eða skotvopnum innan marka kauptúna sýslunnar og hafnarsvæða þeirra. Lögreglustjóri getur ákveðið sérstök æfingasvæði eða veitt heimild til einstakra æfinga með skotvopn. Hlaðin skotvopn má ekki bera á götum kauptúnanna eða á almannafæri innan þeirra. Lögreglustjóri getur bannað sölu skotelda í umdæmi sínu.

10. gr.

Í kauptúnum sýslunnar má ekki kveikja í eldfimur efnum eða sprengiefnum. Ekki má bera þar logandi blys eða kyndla nema með leyfi lögreglustjóra. Nauðsynlegar sprengingar vegna mannvirkjagerðar eru háðar samþykki lögreglustjóra. Sprengiefni eða önnur eldfim efni má ekki hafa í íbúðarhúsum né þar, sem hætta stafar af. Sprengiefni má aðeins geyma þar, sem lögreglustjóri ákveður eða samþykkir.

11. gr.

Almenningi er skylt að hlýða öllum skipunum lögreglumanna, er þeir gefa í þágu réttarvörslu. Lögreglu er heimilt að vísa hverjum þeim brott af almannafæri, sem brýtur gegn ákvæðum þessarar samþykktar um reglu og velsæmi. Ef nauðsyn ber til, geta lögreglumenn krafðið sér til aðstoðar hvern fulltíða mann, sem viðstaddur er.

II. KAFLI

Ákvarðanir til að afstýra truflunum og hættu í veitukerfum, umferð og öryggisþjónustu.

12. gr.

Enginn má án sérstakrar heimildar hrófla við leiðslum eða öðrum búnaði þeirra stofnana, sem starfræktar eru í almenningsspágu, svo sem vatns-, orku- og boðveitu eða slökkviliðs. Verði einhver óviljandi valdur að slíku, skal hann þegar í stað tilkynna það viðkomandi stofnun. Óheimilt er að tálma eða trufla starfsemi lögreglu, slökkviliðs, almannavarna, hjálparsveita eða annarra þeirra, sem annast öryggisþjónustu í þágu almenninga.

13. gr.

Óheimilt er að stunda á almannafæri atvinnu, sem er til tálmunar fyrir umferðina. Sala hvers konar varnings utan sölubúða og farandsala er bönnuð nema með leyfi lögreglustjóra. Þó má án sérstakrar heimildar selja á almannafæri blöð, bæklinga, merki, happdrættismiða, dagskrár, aðgöngumiða og annað þessu skylt. Ef ágreiningur rís, sker lögreglustjóri úr.

14. gr.

Óheimilt er að tálma umferð um vegi nema nauðsyn krefji. Ökutæki eða varning má ekki skilja eftir á vegum lengur en brýna nauðsyn ber til og aldrei á gangstéttum. Heimilt er lögreglustjóra að láta fjarlægja allar tálmanir á kostnað eigenda. Hreppsnefndir ákveða í samráði við lögreglustjóra hvar á vegum bifreiðar og vinnuvélar megi standa. Hreppsnefndir geta sett reglur um stöðureiti og ákveðið gjald fyrir þá. Lögreglustjóra er heimilt að láta fjarlægja á kostnað eigenda ökutæki, er standa án skráningarnúmera á götum, vegum, almennum bifreiðastæðum eða öðrum svæðum í sýslunni.

15. gr.

Á almannafæri má ekki setja neitt, er hindrar umferð eða veldur hættu. Í íbúðahverfum kauptúnanna er bannað að leggja stórum fólks- og vöruflutningabifreiðum og einnig vinnuvélum. Hreppsnefndir geta í samráði við lögreglustjóra veitt undanþágu frá þessari reglu, ef talið er, að slíkt leiði ekki af sér óþægindi eða ónæði fyrir íbúana.

16. gr.

Húseigendur og umráðamenn húsa skulu jafnan leitast við að hreinsa snjóhengjur og grýlukerti af húsum sínum til að fyrirbyggja hættu eða skaða. Pakrennum og frárennslum frá þeim skal haldið svo við, að ekki stafi af þeim hætta, vatnsrennsli eða önnur óþægindi. Gangstígum við og að húsum skulu húseigendur og umráðamenn halda greiðfærum og fjarlægja, svo sem kostur er, snjóbreiður og svellbunka eða annað það, er vegfarendum getur stafað hætta eða óþægindi af.

17. gr.

Nú er hús svo hrörlegt, að hætt er við, að það eða einhver hluti þess hrynji eða fjúki, og getur lögreglustjóri þá bannað notkun hússins og lagt fyrir eigandann að rífa það eða endurbæta svo innan tiltekins tíma, að hættu sé afstýrt. Lögreglustjóri getur á kostnað eigandans gert aðrar nauðsynlegar ráðstafanir til að afstýra hættu eða óþægindum fyrir vegfarendur eða aðra. Hinu sama gegnir, þegar bryggju, steinvegg, girðingu eða öðru liggur við falli eða hruni.

18. gr.

Ekki má fleygja á almannafæri nokkru því, er óþrifum, óþægindum eða hættu getur valdið. Umráðamenn og eigendur skulu gæta þess, að á lóðum þeirra og löndum safnist ekkert það fyrir, sem fokið getur eða valdið tjóni, óþrifum eða lýtum í umhverfinu. Eigi má hafa á almannafæri óbyrgða brunna, safnþrær, skúra, forir eða annað það, sem börnum eða öðrum getur stafað hætta af.

III. KAFLI

Um umferð.

19. gr.

Ökuhraða skal ávallt stilla svo, að eigi valdi hættu eða óþægindum fyrir aðra umferð. Innan kauptúna sýslunnar skal hámarkshraði bifreiða, bifhjóla og annarra ökutækja vera 35 km. miðað við klukkustund.

20. gr.

Þeir, sem flytja vörur eða annað, skulu gæta þess, að flutningstæki séu þannig gerð, að ekki valdi óþrifum eða hættu. Falli eitthvað af flutningstæki, á meðan á flutningi stendur, skal sá, er flytur eða flutningi ræður, hreinsa það upp þegar í stað.

21. gr.

Allur óþarfur akstur utan vega og gatna er bannaður.

Lögreglustjóri getur takmarkað eða bannað umferð bifreiða á einstökum götum eða vegum, ef slík umferð er álitin hættuleg eða til sérlegra óþæginda fyrir aðra umferð. Þá getur lögreglustjóri takmarkað næturumferð ökutækja í kaптúnum sýslunnar.

Aksturskeppnir innan sýslunnar eru háðar leyfi lögreglustjóra, enda liggi fyrir samþykki sveitarstjórnar og veghaldara.

IV. KAFLI

Um götuspjöld, húsnúmer, merkingar lögbýla og auglýsingar.

22. gr.

Hreppsnefndir ákveða götunöfn og láta festa upp nafnspjöld, þar sem þurfa þykir. Húseigendur og umráðamenn húsa í kaптúnum skulu festa á hús sín töluspjöld, er tákna húsaröð. Sömu aðilar skulu annast viðhald og endurnýjun spjaldanna á eigin kostnað.

Eigendur eða umráðamenn lögbýla skulu sjá til þess, að heiti býlanna séu skilmerkilega gefin til kynna við þjóðveg eða annars staðar, er henta þykir.

23. gr.

Hreppsnefndir ákveða, hvar festa skuli upp auglýsingar frá yfirvöldum og öðrum stjórnvöldum. Aðrar auglýsingar má einungis festa upp með leyfi húsráðenda.

24. gr.

Leyfi byggingarnefnda þarf til að setja upp föst auglýsingaspjöld eða aðrar varanlegar auglýsingar og hluti utan á hús. Lögreglustjóri getur jafnan mælt fyrir um brott nám þess háttar, ef það þykir valda hættu eða óþægindum fyrir umferðina.

25. gr.

Hlutaðeigendur skulu taka niður uppfestar auglýsingar, er þær hafa náð tilgangi sínum, og hreinsa vel staðinn, þar sem þær voru hafðar. Enginn má rífa niður löglega uppfesta auglýsingu, krotta í hana eða skemma á annan hátt.

V. KAFLI

Um umgengni og friðun almenningsseigna.

26. gr.

Forsjarmönnum lóða, landa og mannvirkja í einka- eða almenningsseign er skylt að gæta þess jafnan, að því, er þeir hafa forsjá fyrir, sé haldið hreinu og þrífalegu og að það fái nægilegt viðhald og góða umhirðu í hvívetna.

Úr vanrækslu í þessum efnum geta hreppsnefndir látið bæta á kostnað þess, er ábyrgð ber á því, sem um er að ræða.

27. gr.

Eigi má fleygja rusli, úrgangi eða öðru því, er óþrífnaði, óheilnæmi eða óþrýði getur valdið, á lóðir, opin svæði, í hafnir eða svo nærri landi, að borist geti á fjörur. Innan kaптúna sýslunnar má ekki kveikja í rusli eða sorpi nema með leyfi viðkomandi slökkviliðsstjóra.

28. gr.

Bannað er að spilla neysluvatni eða skemma gróður í almenningsgörðum eða á víðavangi. Óheimilt er að brenna sinu nema með leyfi lögreglustjóra, er veitt getur leyfið frá 1. desember til 1. maí.

29. gr.

Mannvirki, girðingar og það annað, sem ætlað er til almenningssnota eða prýði, má enginn lýta, skemma eða færa úr stað.

Áningarstaði, tjaldstæði og útivistarsvæði, hvar sem er innan sýslunnar, skal að notkun lokinni hreinsa vandlega að öllu því, er óprýði og mengun veldur.

VI. KAFLI

Um veitingahús, samkomur og almennar skemmtanir.

30. gr.

Allir veitinga- og gististaðir skulu háðir eftirliti lögreglustjóra og skal lögreglunni jafnan heimill umgangur um húsakynni þau, sem reksturinn fer fram í.

Veitinga- og greiðasölu má einungis hafa um hönd í húsnæði, sem heilbrigðisnefnd viðurkennir og viðkomandi hreppsnefnd hefur samþykkt.

Á öllum gististöðum skal haldin nákvæm gestaskrá.

31. gr.

Hver sá, er selur veitingar, heldur dansleiki, samkomur, aðrar skemmtanir eða selur gistingu, skal afstýra því, að í veitinga- dans- eða gistihúsi hans fari nokkuð það fram, sem brýtur í bága við góða reglu og velsæmi. Hann skal einnig sjá um, að loftræsting og hreinlæti sé í góðu lagi. Verði misbrestur á í þessum efnum, er lögreglustjóra heimilt að banna starfsemina um stundarsakir eða að fullu og öllu, ef ekki er þegar bætt úr ágöllum að fenginni viðvörun.

32. gr.

Unglingum innan 16 ára er eftir kl. 20.00 óheimil dvöl á almennum dansleikjum, öðrum en sérstöðum unglingaskemmtunum skóla, æskulýðsfélaga eða annarra aðila, er til þess hafa leyfi, og skulu þær háðar sérstöku eftirliti. Ungmennum yngri en 18 ára er eftir kl. 20.00 óheimil dvöl á vínveitingastað, nema í fylgd með foreldrum sínum eða maka. Forstöðumönnum dans- og vínveitingahúsa er skylt að fylgjast með því, að ákvæði þessi séu haldin. Viðurlög nema sektum eða missi leyfis til veitinga- eða skemmtanahalds um lengri eða skemmri tíma.

33. gr.

Veitinga- og gististöðum skal loka kl. 23.30 í síðasta lagi og skal sú lokun ekki standa skemur en til kl. 06.00. Allir gestir, sem ekki eiga þar náttstað, skulu vera á brott innan hálftrar stundar frá því, að lokað var. Þó má selja ferðamönnum greiða á hvaða tíma, sem er.

Lögreglustjóri getur veitt leyfi til þess, að skemmtanir og aðrar samkomur standi lengur en til 23.30.

34. gr.

Enginn má reka knattborð, spilakassa eða leiktæki nema með leyfi lögreglustjóra að fengnu áliti viðkomandi hreppsnefndar. Leyfi skal ekki veitt lengur en 4 ár í senn og er óframseljanlegt. Leyfið skal bundið við nafn og veitir leyfishafa aðeins rétt til reksturs í því húsnæði, sem hann hefur þegar leyfið er veitt. Leyfi má einungis veita í húsnæði, sem til þess er hæft að dómi heilbrigðisnefndar.

Unglingum innan 16 ára aldurs er óheimill aðgangur og dvöl að knattborðs- og leiktækjastofum. Aldur miðast við fæðingarár en ekki fæðingardag. Starfsmenn við slík tæki skulu ekki vera undir 18 ára aldri.

Aðgangur að knattborðum, spilakössum og leiktækjum skal einungis heimill frá kl. 15.30 til kl. 23.30 dag hvern að undanskildum föstudeginum langa og fyrri degi stórhátíða þjóðkirkjunnar. Lögreglustjóri getur veitt undanþágu frá ákvæðum um opnunartíma.

Brot gegn ákvæðum þessarar greinar um aldursmörk varðar sviptingu leyfis. Ef leyfishafi brýtur að öðru leyti gegn ákvæðum greinarinnar, reksturinn veldur ónæði í nærliggjandi húsum eða þykir ekki fara vel úr hendi, getur lögreglustjóri svipt hann leyfinu, enda hafi leyfishafi ekki látið sér segjast við aðvörun.

35. gr.

Föst kvikmyndahús eða leikhús má ekki starfrækja í sýslunni nema með leyfi lögreglustjóra að fenginni umsögn viðkomandi hreppsnefndar. Heimilt er að binda leyfið skilyrði um greiðslu leyfisgjalds í sveitarsjóð, og tiltekur þá hreppsnefnd fjárhæðina.

36. gr.

Hver sá, sem heldur skemmtun eða aðra samkomu, skal tilkynna það lögreglustjóra. Hann skal einnig sjá svo um, að þar fari ekkert fram, sem brýtur í bága við reglur og velsæmi. Verði brestur á þessu, er lögreglu heimilt að slíta samkomu og skipa áhorfendum og öðrum að hverfa á brott. Lögreglustjóri getur bannað þeim mönnum aðgang að samkomu, sem ítrekað hafa hagað sér þar ósæmilega.

VII. KAFLI

Um samgöngur við skip.

37. gr.

Lögreglustjóri getur bannað börnum innan 16 ára aldurs umferð um bryggjur og ferðir út í skip og báta í höfnum, ef sérstök ástæða þykir til.

38. gr.

Telji lögreglustjóri þess þörf til að halda uppi velsæmi og góðri reglu, getur hann bannað allar samgöngur við erlend skip.

VIII. KAFLI

Um hundahald.

39. gr.

Hundahald er bannað í kauptúnum sýslunnar, nema með leyfi viðkomandi hreppsnefndar.

40. gr.

Peir hundar, sem ekki er leyfi til að halda, skulu teknir og færðir í sérstakar hundageymslur á vegum hreppanna. Þar skulu hundar geymdir í allt að 7 daga á meðan eigendum gefst kostur á að koma þeim fyrir til frambúðar utan marka kauptúnanna. Kostnaður við töku og geymslu hunda skal að fullu greiddur af eigendum.

Hirði eigendur óleyfilegra hunda ekki um að koma þeim í vörslu utan kauptúnanna innan 7 daga frá því, að þeir voru teknir, né greiði af þeim áfallinn kostnað, skulu hundarnir aflífaðir.

41. gr.

Hundar, sem ráðast á menn eða skepnur, skal fjarlægja þegar í stað. Lögreglustjóri, sveitarstjóri (oddviti), heilbrigðisfulltrúi og dýralæknir taka ákvörðun um það í sameiningu, hvernig með skuli fara, og mega þeir ákveða afturköllun leyfis eða aflífun hunds.

IX. KAFLI

Um búfjárhald og fleira.

42. gr.

Búfjárhald er bannað á skipulagssvæðum kauptúna í sýslunni, nema með leyfi viðkomandi hreppsnefndar.

Um rekstur búpenings til og frá afréttum, hirðingu hans og fjallskil fer eftir ákvæðum fjallskilareglugerðar sýslunnar hverju sinni.

43. gr.

Ef búfé gengur laust í kauptúni innan sýslunnar, skal viðkomandi hreppsnefnd hlutast til um, að það sé handsamað og fært til geymslu á vegum sveitarfélagsins. Sé búfé ekki leyst út innan viku gegn greiðslu kostnaðar og bóta vegna tjóns, sem það kann að hafa valdið, skal það selt á opinberu uppboði eða því slátrað. Allan kostnað af þessum aðgerðum skulu búfjáreigendur greiða.

Eigendur eða umráðamenn ágangsfénaðar skulu sæta sektum, ef rekja má ágang búfjár til vanrækslu þeirra.

44. gr.

Sú búfé haldið án heimildar, skal búfjáreigandi sviptur vörslu þess og það selt á opinberu uppboði eða því slátrað. Allan kostnað, sem af þessu hlýst, skulu búfjáreigendur greiða.

45. gr.

Allir flækingskettir, sem enginn eigandi finnst að, er lögreglu heimilt að aflífa.

X. KAFLI

Um gildi samþykktarinnar, refsingar og kostnað.

46. gr.

Samþykkt þessi gildir fyrir lögsagnarumdæmi Vestur-Ísafjarðarsýslu. Hún gildir til eftirbreytni og um þær aðstæður og starfsemi, sem fyrir eru í sýslunni.

47. gr.

Ef einhver lætur það ógert, sem er skylda hans samkvæmt samþykktinni, má lögreglustjóri láta framkvæma það eða gera nauðsynlegar ráðstafanir til að hindra, að vanrækslan valdi tjóni. Allur kostnaður vegna þeirra ráðstafana, sem lögreglustjóri gerir til að hindra brot gegn samþykktinni, greiðist af viðkomandi eða, ef hann er ekki fær um það, úr ríkissjóði.

48. gr.

Með mál út af brotum á samþykkt þessari skal fara að hætti opinberra mála.

Brot gegn samþykkt þessari varða sektum, ef ekki liggur þyngri refsing við brotinu samkvæmt lögum.

49. gr.

Samþykkt þessi öðlast þegar gildi. Jafnframt fellur úr gildi lögreglusamþykkt fyrir Vestur-Ísafjarðarsýslu, nr. 315 22. ágúst 1977, og öll önnur staðbundin ákvæði, sem kunna að brjóta í bága við samþykkt þessa.

Lögreglusamþykkt þessi, sem sýslunefnd Vestur-Ísafjarðarsýslu hefur samið og samþykkt samkvæmt lögum nr. 107 8. maí 1935 um lögreglusamþykktir utan kaupstaðanna, staðfestist hér með og birtist til eftirbreytni öllum þeim sem hlut eiga að máli.

Dóms- og kirkjumálaráðuneytið, 1. júlí 1985.

Jón Helgason.

Ólafur W. Stefánsson.

AUGLÝSING

um staðfestingu sjávarútvegsráðuneytisins á verðgrundvelli á frystri rækju fyrir framleiðslutímabilið frá 1. júní til 30. september 1985.

Með skírskotun til laga nr. 72 28. maí 1969, um Verðjöfnunarsjóð fiskiðnaðarins og samkvæmt tillögum stjórnar Verðjöfnunarsjóðs, hefur ráðuneytið staðfest eftirfarandi verðgrundvöll á frystri rækju fyrir framleiðslutímabilið frá 1. júní til 30. september.:

Vélskelflett rækja

SDR pr. lb. cif.

Færri en 350 st. í lb.:

Blokkfryst	2,539
5×2 kg. og 4×2,5 kg. vatnshúðuð, sérfryst	2,539
5×2 kg. og 4×2,5 kg. óvatnshúðuð, sérfryst	2,661
500 gr. vatnshúðuð, sérfryst	2,957
200 gr. vatnshúðuð, sérfryst	3,101

Fleiri en 350 st. í lb. og óflokkuð:

Blokkfryst	2,427
5×2 kg. og 4×2,5 kg. vatnshúðuð, sérfryst	2,427
5×2 kg. og 4×2,5 kg. óvatnshúðuð, sérfryst	2,539
500 gr. vatnshúðuð, sérfryst	2,815
200 gr. vatnshúðuð, sérfryst	2,957

Verðbil verður 5%.

Greiðslur í sjóðinn eða úr miðast við 62,5% af verðbreytingu frá grundvallarverði að teknu tilliti til verðbils.

Verðið miðast við viðskiptagengi (skilagengi) eins og það er á hverjum tíma.

Sjávarútvegsráðuneytið, 1. júlí 1985.

F. h. r.

Árni Kolbeinsson.

Sigurður P. Sigmundsson.